


Ni Presidente Henry B. Eyring

Umuna a Mammagbaga
iti Umuna a Panguluén



Ragsak para Kadagiti Ay-ayatentayo

Kayattayo amin nga agragsak dagiti ay-ayatentayo ken kayattayo nga agrigatda met bassit no mabalin. Bayat ti panangbasatayo kadagiti pakasaritaan maipapan iti ragsak—ken ti rigat—iti Libro ni Mormon, naaringan dagiti kaunggan ti riknatayo no panunotentayo dagiti ay-ayatentayo. Daytoy ti pudno a pakasaritaan ti maysa a panawen ti panagragasak.

“Ket napasamak nga awan ti panagrinnupir iti pagilian, gapu iti ayat ti Dios a nagnaed iti puso dagiti umili.

“Ket awan ti innapal, wenno panagpungtot, wenno riribuk, wenno panagiinnabig, wenno panagulbod, wenno pampapatay, wenno ania man a kita ti panaggartem; ket pudno awanen ti naragragasak a tao kadagiti amin a tao a pinarsua ti Dios.”

Kalpasanna mabasatayo:

“Ket anian a naggasatda! Agsipud ta pinaraburan ti Apo ida iti amin nga aramidda; wen, ket naparaburanda ken nagrang-ayda agingga iti sangagasut-ket-sangapulo a tawen ti napalabas; ken idi nakalikuden ti umuna a kaputotan manipud ken ni Cristo, ket awan ti panagrinnupir iti pagilian” (4 Nephi 1:15–16, 18).

Agkararag ken agrabaho dagiti managayat a disipulo ni Cristo para iti kasta a bendision para kadagiti dadduma ken para iti bagbagida. Manipud kadagiti pakasaritaan iti Libro ni Mormon ken, para iti kaaduan kadatayo, manipud iti bukodtayo a padas, ammotayo a ti sagut ti kinaragsak ket magun-od. Ammotayo a ti dalan nga agturong iti ragsak ket silalawag a namarkaan. Ammotayo pay a saan

a nalaka ti panangpatalinaed iti ragsak malaksid no, kas kadagiti Nephite kalpasan ti isasarungkar ti Mangisalakan, agtalinaed iti puspusotayo “ti ayat ti Dios”.

Adda dayta nga ayat iti puspuso dagiti Nephite gapu ta nagtungpalda iti linteg a nangaramid a posible iti daytoy. Ti pakagugpogan dayta a linteg ket masarakan iti kararag ti sakramento, a mangrugi iti naimpusuan a pakaasi iti managayat a Nailangitan nga Amatayo. Agkararagtagayo nga addaan iti puso a napnuan iti pammati, ken addaan iti nalaus nga ayat para iti bukodtayo a Mangisalakan. Agkumittayo nga addaan pudno a panggep nga umawat kadatayo iti naganna, manglaglagip Kenkuana, ken agtungpal kadagiti bilinna. Iti kamaudiananna, usarentayo ti pammatitayo a ti Espiritu Santo, ti maikatlo a miembro ti Kinadios, mabalin a kanayon a kadmudatayo, a mangipampaneknek iti puspusotayo ti maipapan iti Ama ken ti Patpatgenna nga Anakna. (Kitaen iti DkK 20:77, 79.)

Iti panangkadkadua ti Espiritu Santo kadatayo, makapagbalbaliw ti puspusotayo tapno tarigagayan ken pasangbayentayo ti ayat ti Nailangitan nga Amatayo ken ti Apotayo a ni Jesucristo. Simple ti wagas a pakagun-odan iti ayat ti Dios iti puspusotayo, kas iti wagas a pakapukawan iti rikna iti dayta nga ayat iti puspusotayo. Kas pagarigan, mabalin a pilien ti maysa a tao ti manmano a panagkararag iti Nailangitan nga Ama wenno saan a panagbayad iti naan-anay nga apagkapullo wenno agsardeng nga agpennek iti balikas ti Dios wenno di mangikankano kadagiti napanglaw ken agkasapulan.

Ania man a pili a saan a panagtungpal kadagiti bilin ti Dios ket makaigapu iti ipapanaw ti Espiritu manipud iti puspusotayo. Iti dayta a pannakapukaw, umawan ti kinaragsak.

Ti ragsak a tarigagayantayo para kadagiti ay-ayatentayo ket agpannuray kadagiti pilida. Agingga nga ay-ayatentayo ti maysa nga ubing, ti maysa nga investigator, wenna dagiti gagayyemtoy, ditayo ida mapilit nga agtungpal kadagiti bilin tapno maikarida a sagiden ken pagbalaliwen ti Espiritu ti puspusoda.

Isu a ti kasayaatan a tulong a maitedtoy ket ti ania man a mangiturong kadagiti ay-ayatentayo a mangsipot kadagiti bukodda a pili. Inaramid ni Alma daytoy nga addaan iti awis a mabalinyo nga ited:

“Agpakumbabakayo iti sango ti Apo, ket awaganyo ti nasantuan a naganna, ket agsalukag ken agkararagkayo a kanayon, tapno saankayo a masulisog iti nalablabes ngem iti kabaelanyo, ket iti kasta iturongnakayo ti Nasantuan nga Espiritu, nga agbalin a napakumbaba, naemma, managpabus-oy, naanus, napnuan iti ayat ken managitured;

“Addaan iti pammati iti Apo; addaan iti namnama nga umawatkayo iti agnanayon a biag; addaan iti ayat ti Dios a kanayon iti puspusoyo, tapno maitag-aykayo iti maudi nga aldaw ket makastrekakayo iti paginanaanna” (Alma 13:28–29).

Ikararagko a sapay kopa ta maawat dagiti ay-ayatenyo ti naparegta nga awis a pumili iti dalan nga agturong iti manayon a ragsak.

PANANGISURO MANIPUD ITI DAYTOY A MENSAHE

Isuro ni Presidenter Eyring a ti ragsak a mariknatayo iti biag ket agpannuray kadagiti pangngeddeng nga aramidentayo. Bayat ti panangilawlawagyo itoy a mensahe, ibilang ti papangipokus kadagiti banag a dinakamat ni Presidente Eyring a mabalintayo a pilien nga aramiden (kas iti panagkararag, panagtrabaho, panangusar iti pammati, ken panangikumit iti bagbagitayo nga addaan napudno a panggep) a mangiturong kadatayo iti dayta dalan ti kinaragsak. Mabalinyo nga awisen dagiti sursuruanyo a mangisurat iti dua wenna tallo a tignay a kayatda nga aramiden a mabalina a mangiturong kadakuada a nasaysayaat iti “dalan nga agturong iti manayon a ragsak.”

AGTUTUBO

Dagiti Tignay a Mangiturong iti Ragsak

Isuro ni Presidente Eyring a “ti ragsak a tarigagayantayo para kadagiti ay-ayatentayo ket agpannuray kadagiti pilida.”

Mabalinyo a basaen ti maipapan iti epekto a mabalina nga adda iti pili manipud kadagiti pagwadan da Nephi, Laman, ken Lemuel. Nagdayamudom da Laman ken Lemuel ket saanda a kinayat ti agtungpal kadagiti bilin (kitaen iti 1 Nephi 2:12). Kas banagna, nailunodda ken dagiti kaputotanda ken napapanawda manipud iti sidong ti Apo (kitaen iti 2 Nephi 5:20–24). Pinili ni Nephi ti agtungpal kadagiti bilin (kitaen iti 1 Nephi 3:7), ken gapu iti dayta, isu ken dagiti taona “nagbiagda iti kinaragsak” (2 Nephi 5:27).

Mabalinyo a pilien ti agbalin a nalinteg ken naragsak. Ngem nalabit a dagiti tao iti lawlawmo ket agaramidda kadagiti madi a pili a mangiturong iti panagrigat ken saan a pannakagin-awa. Idinto nga isuda ti akin-aramid kadagiti pangngeddeng, mabalina a makaimpluensia ti pagwadam kadagiti pili nga aramidenda. Kasano a makaisangbay iti ragsak kadagiti dadduma dagiti pilim? Paglilinnawaganyo iti familiayo dagiti nadumaduma a wagas a mabalina a makaimpluensia a nasayaat kadagiti adda iti lawlawyo ken makatulung kadakuada a makarikna iti ragsak.

ANNAK

Ti Karit iti Kinaimbag

Idi bisitaen ni Jesus dagiti tao iti America, sinuruanna ida nga aggiinnayat iti tunggal maysa ken agbalin a naimbag. Ania ti mabalinyo nga aramiden tapno sumurotka ken Jesus ken ayatem dagiti sabali? Dagitoy ti sumagmamano a kapanunotan: Ikkam iti tsek ti tunggal karit apaman nga aramidem.

- Mabalinko nga arakupen ti maysa a tao a naliday.
- Makapagserbiak iti maysa a tao iti nalimed.
- Makapagbasaak wenna makapagbuyaak iti maysa bitla iti komperensia maipapan iti panagbalin a naimbag.
- Makapagkantaak iti maysa a kanta ti Primary para iti pamiliak.
- Mabalinko ti umisem iti maysa a tao a kasla malidlidayan.
- Mabalinko _____.
- Mabalinko _____.



Pammati , Pamilia , Tulong

Ti Kaamaan: Maysa a Waragawag iti Lubong

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawat iti doktrina ti pamilia ket mangbendision kadagiti ay-ayuananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Maipapan iti sapa sap a miting iti Relief Society idi 1995, idi immuna a binasa ni Presidente Gordon B. Hinckley (1910–2008) ti Ti Kaamaan: Maysa a Waragawag iti Lubong,“ kinuna ni Bonnie L. Oscarson, sapa sap a presidente ti Young Women: “Agyamankami ken ipategmi ti kinalawag, kinasimple, ken kinapudno daytoy a dokumento maipapan iti paltiing. . . . Ti waragawag iti kaamaan ket nagbalinen a pagrukodan iti panangeddeng kadagiti pilosopia ti lubong, ket paneknekak a dagiti prinsipio a naituding . . . ket pudno ita a kas idi inted kadatayo ti maysa a propeta ti Dios iti dumani 20 a tawenen ti napalabas.”¹

“Manipud iti waragawag ti kaamaan,” innayon ni Carole M. Stephens, umuna a mammagbaga iti sapa sap a panguluen ti Relief Society, “masursurotayo, ‘Iti biag sakbay a nayanak iti daga, ammo ken dinaydayaw dagiti espiritu nga annak a lallaki ken babbai ti Dios kas Agnanayon nga Amada’² . . .

“ . . . Maibilangtayo ken masapul-datayo iti pamilia ti Dios.”³

Agbibigatayo iti panawen a nasken a salakniban dagiti nagannak dagiti pagtaengan ken kaamaanda. “Ti Kaamaan: Maysa a Waragawag iti Lubong” ket mangiwanwan kadatayo.

Dagiti Mainayon a Nasantuan a Kasuratan

Mosiah 8:16–17;

Doktrina ken Katulagan 1:38

Dagiti Estoria ti Tattao a Sibibiag Pay

“Kinuna ni Lee Mei Chen Ho manipud iti Tao Yuan Third Ward, Tao Yuan Taiwan Stake, a ti waragawag ket nakaisuro kenkuana a dagiti panaglallangen ti kaamaan ket makatulong a mangpadur-as kadagiti nadiosan a kababalin kas iti pammati, panaganus, ken ayat. ‘Idi padasek a pasayaaten ti bagik a mayannurot iti waragawag, mapadasak ti pudno a kinaragsak,’ kinunana.”⁴

Kinuna ni Barbara Thompson, nga adda idi maibasa ti waragawag iti umuna a gundaway ken idi agangay nagserbi a kas maysa a mammagbaga iti sapa sap a panguluen ti Relief Society: ‘Napanunotko

iti apagkanito a [ti waragawag ti pamilia] ket saan a maipanggep unay kaniak gapu ta awan pay asawak ken awan pay annakko idi. Ngem alisto a napanunotko, ‘Ngem maipanggep kaniak daytoy. Miembroak ti maysa a pamilia. Maysaak nga anak a babai, kabsat a babai, ikit, kasinsin, kaanakan, wenno apoko a babai. . . . Uray no sisiak laeng ti sibibiag a miembro ti pamiliak, miembroak pay laeng ti pamilia ti Dios.’”⁵

DAGITI NAGADAWAN

1. Bonnie L. Oscarson, “Defenders of the Family Proclamation,” *Liahona*, Mayo 2015, 14–15.
2. “Ti Kaamaan: Maysa a Waragawag iti Lubong,” *Liahona*, Nob. 2010, 129.
3. Carole M. Stephens, “The Family Is of God,” *Liahona*, Mayo 2015, 11.
4. Nicole Seymour, “The Family: A Proclamation to the World’ reaches 10-Year Milestone,” *Liahona*, Nob. 2005, 127.
5. Barbara Thompson, in *Daughters in My Kingdom: The History and Work of Relief Society* (2011), 148

Ibilang Daytoy

Kasano a ti “Ti Kaamaan: Maysa a Waragawag iti Lubong” ket maysa a dokumento para iti panawentayo?